

«Be politica da pussanza»

Las parolas e la visita da la cussegliera federala tar la pld dal Grischun

DA GION NUTEGN STGIER / FMR

■ **Per l'emprima giada è la cussegliera federala Karin Keller-Sutter stada giast dals liberals grischuns. Cun il Grischun haja ella adina gi ina relaziun pli stretga. Ella turna gia puspè en diesch dis cun sa participar al Forum mundial d'economia a Tavau.** Tradiziunalmain ha l'apero da Bumaun da la Partida liberaldemocratica ils liberals dal Grischun (pld) gi lieu en il chastè dal viticulter *Gian-Battista von Tscharnet* a La Punt/Rehanau. L'interess per quel è stà fitg grond e blers liberals èn segir er vegnids pervi da la visita da la cussegliera federala *Karin Keller-Sutter*.

Public avant ch'il cussegl federal tracta

En in discurs cun il cusseglier dals chantuns ha la magistrata ditg che quai che succedia da preschent en l'Iran saja bunamain be ina chausa da la politica da pussanza. Ella ha er menziunà che l'Iran na saja per las naziuns vischinas nagin pajais cun ina gronda attaschadadad. Las turbulenzas politicas en l'Iran hajan segir er in'influenza sin la politica da migraziun, schizunt er per la Svizra.

Quai che pertutga pussanza, quella ins possa attribuir er a l'administraziun federala, uschia la cussegliera federala. Er en quella vegnia fatg politica da partida. Savens sajan decisiuns politicas rendidas publicas avant ch'il cussegl federal haja insumma tractandà ubain prendi enconuschientscha da quellas. Da ses

temp sco cussegliera governativa dal chantun Son Gagl sappia ella che da l'administraziun na gieva nagut vers anora, quai che na saja insumma betg il cas tar l'administraziun federala. L'administraziun federala saja segir bler pli pussanta ch'in'administraziun chantunala. Dad esser cussegliera federala saja per in pau pli simpel che d'esser cussegliera governativa, ha ditg Keller-Sutter.

In barat da 120 milliardas francs

Durant il Forum mundial d'economia a Tavau vegnia ella a s'inscuntrar cun plirs represchents da l'Uniun europeica. La Svizra saja er en l'avegnir dependenta da las tractativas bilaterals ed er da bunas cunvegns da basa. Cun ils partenaris da l'exteriur haja la Svizra per onn in barat da 120 milliardas francs, ha ditg la cussegliera federala. A Tavau na vegnia ella betg ad entupar *Donald Trump*, il president dals Stadis Unids da l'America. Quel inscunter surlaschia ella a *Simonetta Sommaruga*, la presidenta da la regenza svizra. A Tavau saja er uschia ch'i dettia savens era entupadas a curta vista.

Per il Grischun saja la politica da la forza idraulica er en l'avegnir da grond'impurtanza. Cun ils dus cussegliers dals chantuns *Martin Schmid* e *Stefan Engler* haja il Grischun dus fermes promoturs da quell'energia en la chombra pitschna. Keller-Sutter ha lura er ditg ch'en general avessia la pld d'avair dapli tschaffen da cumbatter, cunzunt

per sias valurs liberalas. Quella voluntad manchia in pau.

Cuntanschi la finamira tar las elecziuns

Bruno W. Claus, il president dals liberals grischuns, ha ditg che tar las elecziuns naziunalas haja la pld cuntanschi sia finamira cun esser da nov represchenta en il parlament svizzer cun duas persunas. El ha lura er gratulà al cusseglier dals chantuns *Martin Schmid* per sia reelecziun ed ad *Anna Giacometti* per sia elecziun en il cussegl naziunal.

Il cusseglier guvernativ e president da la regenza *Christian Rathgeb* ha ditg en ses pled che da la fracziun da la pld spetgia el in cler sustegn quai che pertutgia la determinaziun da la politica da finanzas. Concernent elecziuns sajan las tschernas communalas da la citad da Cuir e da la vischnanca Tavau da grond'impurtanza per la pld.

Per la renovaziun dal Plantahof

Ils 9 da favrer 2020 va il suveran svizzer a l'urna ed er en il Grischun stat en tavlina votaziun. Ils delegads da la pld èn cunter l'iniziativa per dapli abitaziuns pajablas. Decidi han els perquai unanimamain da dir na a quell'iniziativa.

Cleramain gea han ils preschents ditg al scumond da discriminar pervia da l'orientaziun sexuala. E senza discussiun han ils liberals alura ditg gea al credit da renovar il center da dietas al Plantahof.



La cussegliera federala Karin Keller-Sutter (pld) ensemen cun il cusseglier dals chantuns Martin Schmid.



Ils liberals grischuns cun la cussegliera federala: Bruno W. Claus, Christian Rathgeb, Karin Keller-Sutter, Anna Giacometti e Martin Schmid (da san.).